

**Henti Berdemonstrasi, Kini Tumpu Masa Berkhidmat Kepada Rakyat  
Bernama  
24 Jun, 2013  
Analisis Berita Oleh Harlina Samson**

KUALA LUMPUR, (Bernama) -- Majlis mengangkat sumpah jawatan 222 anggota Dewan Rakyat termasuk 89 anggota pembangkang bagi Parlimen ke-13 yang bermula Isnin berjalan lancar, jelas sekali keputusan Pilihan Raya Umum ke-13 (PRU13) diterima semua pihak.

Keadaan berjerebu yang melanda negara dan perhimpunan Black 505 di Padang Merbok berhampiran Bangunan Parlimen tidak sedikit pun menjejaskan majlis mengangkat sumpah jawatan anggota Dewan Rakyat.

Gambar-gambar yang disiarkan di laman media online, laman sosial Facebook dan Twitter serta blog-blog menceritakan semua ini.

Sebelum ini gambar jerebu tebal menyelubungi ruang udara beberapa kawasan menghiasi laman berkenaan, selain gelagat serta khemah peserta perhimpunan Black 505 di Padang Merbok pada Sabtu lepas.

Gambar menarik hari ini adalah aksi Ketua Pembangkang Datuk Seri Anwar Ibrahim mengangkat sumpah jawatan sebagai Anggota Parlimen Permatang Pauh dan juga suasana mesra Penasihat PKR itu bersama Perdana Menteri Datuk Seri Najib Tun Razak dan timbalannya Tan Sri Muhyiddin Yassin serta Speaker Dewan Rakyat Tan Sri Pandikar Amin Mulia semasa sesi bergambar dan jamuan.

Melihat perkembangan ini, apakah sebenarnya yang ingin dibuktikan oleh parti pakatan DAP-PKR-PAS?

Anwar dan pemimpin sekutunya sejak 8 Mei mengadakan perhimpunan Black 505 di Stadium Kelana Jaya serta beberapa negeri bagi membantah keputusan pilihan raya yang didakwa penuh penipuan dan mendesak pengerusi dan timbalan pengerusi Suruhanjaya Pilihan Raya meletak jawatan.

Pensyarah kanan Fakulti Sains Sosial, Universiti Sains Malaysia (USM) Dr Azeem Fazwan Ahmad Farouk berkata anggota Parlimen pakatan pembangkang yang mengangkat sumpah jawatan sebenarnya telah menerima keputusan PRU13.

"Dengan mengangkat sumpah jawatan, ia sebenarnya menunjukkan mereka menerima proses pilihan raya umum dan keputusannya, dan mendapat kuasa," katanya kepada Bernama Isnin.

Katanya pemimpin pakatan pembangkang tidak sepatutnya mengangkat sumpah, mengikrarkan kesetiaan kepada negara dan Perlembagaan Persekutuan, sekiranya mereka tidak berpuas hati dengan proses pilihan raya yang mereka dakwa wujud penipuan.

"Mulanya mereka cuba menjejaskan proses pilihan raya dan dalam pada itu, mereka menerima proses itu...ini menunjukkan mereka tidak tetap pendirian dan pengundi kini perlu fikir secara bijak mengenai tindakan mereka (pembangkang)," katanya.

Jadi, apa pula sekarang?

Sepertimana seorang peguam kanan Roger Tan pernah berkata "semua ini adalah mengenai demokrasi, dan bukan "democracy". Mahkamah pilihan raya adalah platform terbaik untuk menyelesaikan pertikaian mengenai keputusan pilihan raya dan dakwaan mengenai kepincangan pilihan raya.

Tarikh akhir untuk memfailkan petisyen pilihan raya berakhir 12 Jun dan parti-parti politik kini berdepan pertarungan di mahkamah untuk mencabar keputusan PRU13. Pakatan DAP-PKR-PAS memfailkan 35 petisyen pilihan raya manakala Barisan Nasional (BN) 21.

"Mereka boleh sentiasa mencabarnya di mahkamah yang merupakan wadah yang betul dan patut berhenti berdemonstrasi. Ketika ini beberapa kes sedang dibicarakan di mahkamah tetapi sehingga hari ini masih belum selesai, kenapa perlu berdemonstrasi? Hentikannya sehingga ia diputuskan," kata Azeem.

Jadi kenapa perlu menghasut rakyat untuk menyertai demonstrasi khususnya dalam keadaan berjerebu sekarang dan merisikokan kesihatan mereka dan menjejaskan produktiviti negara?

Timbalan Pengarah Bahagian Kepimpinan, Korporat dan Perhubungan Antarabangsa Universiti Pertahanan Nasional Malaysia yang juga pensyarah kanan Dr Jessica Ong Hai Liaw berkata adalah lebih baik untuk pemimpin pakatan pembangkang menerima keputusan pilihan raya mengikut Perlembagaan Persekutuan.

"Sehingga sekarang kita tidak mempunyai sebarang bukti untuk kita bantah proses pilihan raya dan yang jelas ini bukan caranya. Dengan mengambil kira konsep 1Malaysia, bantahan itu tidak selaras dengan perpaduan nasional," katanya.

Beliau percaya bantahan boleh dilakukan dengan cara aman menerusi saluran yang betul.

"Mungkin menerusi rundingan aman dan bukannya protes kerana 'rakyat' yang sentiasa menjadi mangsa pada akhirnya. Ikut proses yang betul menggunakan akal fikiran dan rasional atau menerusi debat intelektual daripada berdemonstrasi," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=958506>